

朝廷事體之重無燭微臣進退之難亟許適免 荅曰目今國事孔棘議處之

事亦多須體予意從速出仕○備局以西報方警請抄武臣堂上以上在外者

召集京師以備調用上許之○已酉管餉使南以雄請設屯田於西路閑曠

之地許之時以雄掌轉餉之任適值連年失稔毛營需索邊餉接濟措辦無

策故至是啓請于朝自明年大舉設屯戶曹判書沈悅亦以為得粟之策莫如

屯田從之○命別赴防砲手等試才賞以衣物從訓練都監之請也○備局

啓曰奴賊現形越邊犯境與否雖不可知平壤以東兵力甚單今者摠戎使李

曙畿輔團束之軍多至二萬餘人請就其中抄出精壯使之裝束以為待敵之

地從之○都體察使張晚請董率諸將出鎮松都平山之間許之是時邊

鄙多聳防備甚踈帥臣李弘胄雖任關西素不閑軍旅故士不歸心人無固志

晚自請出鎮許之其後賊騎撤歸不果行○諫院啓曰備局之設專為籌邊

當此孔棘之日警報踵至而恬不動念經日之後緩緩開坐極為非矣有司堂

上請推考 荅曰依啓緩緩來會之失舉皆難免矣○兵曹判書金尚容上疏

乞解職擇授曉暢軍旅名望素著之人 荅曰目今邊虞孔棘亦有議處之務

卿勿控辭速為出仕○夜坤方有氣如火光 仁祖大王實錄卷之七